

SAD i Afganistan pregovaraju s talibanima

16 februar 2012 Izmijenjeno 08:07 CET

Afganistanski predsjednik Hamid Karzai potvrdio je da su afganistanske vlasti i SAD započeli pregovore sa talibanima



Pregovori bitan napredak u naporima da se desetogodišnji sukob u Afganistanu privede kraju [AP]

Sjedinjene Američke Države i afganistanske vlasti započele su trostrane pregovore s talibanima, potvrdio je afganistanski predsjednik Hamid Karzai u razgovoru za list *Wall Street Journal*. "Bilo je kontakata između američkih vlasti i talibana, bilo je kontakata između afganistanskih vlasti i talibana i bilo je kontakata na kojima smo bili svi zajedno", rekao je Karzai za izdanje lista za četvrtak. On nije htio otkriti gdje su se pregovori odvijali niti dati bilo kakve dodatne pojedinosti iz bojazni da bi otkrivanje tih podataka štetilo procesu. "Ljudi u Afganistanu žele mir, uključujući i talibane. Oni su isto ljudi kao i mi, imaju porodice, rođake, djecu i prolaze kroz teško razdoblje", prenosi *WSJ* riječi Karzaija s kojim su razgovarali u Kabulu.

Poruke talibana

List piše da su pregovori bitan napredak u naporima da se desetogodišnji sukob u Afganistanu privede kraju, naglašavajući da se Karzaijeva vlada ranije bunila jer je bila izostavljena iz pregovora Washingtona i pobunjenika. Međutim, u srijedu su afganistanski talibani iskoristili 23. godišnjicu sovjetskog poraza i povlačenja iz Afganistana da poruče SAD-u da ih čeka ista sudbina. "Sebični Amerikanci moraju izvući pouku iz ruskog poraza i moraju prestati voditi besmislenu bitku s visoko motiviranim Afganistancima i povući svoje osvajačke snage što prije", poručili su u poruci dostavljenoj medijima, prenosi Reuters.

Poslije rata, koji je ušao u 11. godinu, SAD i NATO se pripremaju za povlačenje iz Afganistana i žure obučiti afganistansku vojsku i policiju kako bi mogla preuzeti nadležnosti iz oblasti sigurnosti prije kraja 2014. godine.

Izvor: *Al Jazeera*